

Ku Li bayangkan tidak terlibat komplot 'guling' Najib

Astro Awani

Ogos 15, 2015

Rahimah Abdullah,

KUALA LUMPUR: Tengku Razaleigh Hamzah masih menyokong kepimpinan Datuk Seri Najib Tun Razak dan membayangkan beliau bukan tokoh politik yang dikaitkan dalam komplot 'menggulingkan' Perdana Menteri.

Pada masa sama, tegasnya, Bekas Menteri Kewangan itu memilih pemimpin yang melakukan perkara betul dan bercakap benar kepada rakyat.

"Ya, saya masih berada dalam barisan backbenchers. Saya bukan barisan pembangkang.

"Tetapi saya harap kita semua lakukan benda yang betul dan bercakap benar serta menerangkan kepada rakyat apa yang sepatutnya," kata Ahli Parlimen Gua Musang semasa ditemui di Rumah Terbuka Aidilfitri Persatuan Anak Gua Musang di sini hari ini.

Pada Sabtu, Timbalan Perdana Menteri Datuk Seri Dr Ahmad Zahid Hamidi mendedahkan ada 'tokoh tertentu' dari kalangan parti pemerintah yang ingin menggulingkan kerajaan.

Namun Ahmad Zahid yang enggan mendedahkan tokoh tersebut memberitahu individu berkenaan kini mengharapkan sokongan daripada 87 ahli parlimen Pembangkang dan seorang ahli parlimen Bebas untuk menjatuhkan Kerajaan menggunakan 'pintu belakang'.

Tengku Razaleigh juga kelihatan berdolak-dalik apabila pemberita mengajukan beberapa soalan tambahan berkenaan isu tersebut.

"Apa pendapat kamu? Mungkin ada (komplot), mungkin tiada (komplot).

"Ia adalah satu 'berita' bagi saya," ujarnya.

Ditanya kebimbangan tokoh veteran itu terhadap lanskap politik sekarang terutama dalam UMNO, beliau menjawab: "Saya nak tengok keadaan sebagaimana ditentukan oleh perlembagaan parti, dan kita semua pemimpin mesti tunjuk bahawa kita boleh dipercayai oleh orang ramai.

"Kita kena lakukan apa yang patut, seperti mana rakyat beri mandat kepada kita. Tidak boleh lakukan perkara yang luar biasa. Kita akan timbulkan tanda tanya... tidak baik untuk parti."

© 2015 Astro Awani Network Sdn. Bhd. (535275-D) All Rights Reserved.

Source: <http://www.astroawani.com/berita-politik/ku-li-bayangkan-tidak-terlibat-komplot-guling-najib-69967>